

四庫全書

集部

欽定四庫全書

容春堂別集卷七

明 邵寶 撰

墓誌銘

十八首

壙銘

一首

明封宜人王母任氏墓誌銘

宜人任氏為隆慶州知州進階奉直大夫王公某之配  
其子今南京戶部右侍郎瓊先為工部主事以考績例  
宜人始封安人比進員外郎乃加今號按任氏世居山  
西太原宜人父曰恩母郝氏年十七歸奉直公公父某

工部尚書公某子也宜人入門敬謹雍穆事尚書公及其配李夫人以孝稱初公為諸生讀書黌舍中宜人居家治食飲以供及小大諸務一不煩公心尚書公好施予宜人常佐公承其志李夫人老而傷股在牀褥者幾年宜人與公躬澣滌無怠夫人至忘其恙以終後公舉于鄉筮仕知昌黎縣宜人獨留于家凡十年教飭諸子女畢婚嫁壺以内無隳事比公遷隆慶戶部以進士便道過家迎宜人從公于官居數年公罷政歸於是家

指日繁宜人以勤儉相公諸子遵之皆尚朴素蓋若有  
政焉又數年公卒宜人哀以禮戶部由工部郎中累遷  
至右副都御史理兩淮鹽課時宜人皆就養及總漕運  
被召還朝孫朝立乃自臨清侍宜人歸太原既而轉吏  
部右侍郎再改今官而宜人以疾卒正德己巳五月有  
五日也距其生宣德己酉十月十有六日壽八十一子  
男四長瑤國子生次即瓊次玠義官次珮儒士女三長  
適國子生太谷白元瓚次適郡庠生榆次羅崇德次適

陽曲張永相孫男八長即朝立儒士次朝元國子生次  
朝翰朝簡朝迪朝選朝起朝碩女七長適渾源郭衛邦  
次適舉人鴈門崔允次許嫁平定郝元洪餘皆幼曾孫  
男女各一宜人之始卒也戶部時奉勅賑饑南畿厥既  
聞訃即具事狀徵銘于寶寶以漕事朝京師其姻駙馬  
都尉崔公又為之速會寶致仕東歸未能執筆以復明  
年庚午三月十七日戶部奉宜人安厝于柳林之墓合  
奉直公兆倅以書來請終銘之銘曰烏乎宜人德稱于

家子為國禎天王用嘉載錫之號有誥以華至光無幽  
至顯無遐我銘一辭於宜人乎奚加

仲室趙孺人墓誌銘

正德丁卯冬陝西按察副使仲君與立寓書湖南徵予  
銘其室趙氏孺人之墓既而其子承祐寓朱戶部某所  
為狀至自寶應予以君失嘉耦方為惜之而何能不銘  
之始予舉進士獲識君之父太醫院使前通政松東公  
於京師知公事其母貞節鄭太宜人孝其配楊宜人奉

以周旋伏臘燕饗無專無廢能不失鄭意公子三人既有室猶遣出游潘南屏丁補齋二先生之門每旬日一歸讀誦不輟其家法之肅如是今讀朱狀乃知有婦如孺人者固亦有與哉及予為許州君舉進士由刑部主事出判汝寧稔聞其卓異之譽狀謂孺人相而慰之其亦信然狀又謂君三歷臬司孺人自留奉姑于家而卜妾以從待寡姊遺之佚撫孤姪導之勤皆人所難者由前所聞質諸今所稱銘之實宜初孺人疾亟其女適朱

應辰者密封股肉和藥以進君子稱孺人有女孺人姓趙氏其先淮人後徙寶應西安同知某者其叔祖也父曰剛母某氏其生為天順辛巳十二月二十六日越若干年歸于仲又若干年正德戊辰六月三日以疾卒年四十有八葬以卒之又明年某月某日墓在邑北郭某邱之原子男二長即承祐縣學生娶儲亞卿靜夫女次承穀娶某氏其庶亦二承慶娶某氏承汴娶某氏女三長壻即應辰朱知縣存仁子也餘尚幼銘曰仲有壽姑



有婦克孝孝婦有婦惟孝婦是效三世傳德遂成壺教  
柰何不吊吾嘉仲宗茲以銘趙

故無錫縣道會梅鶴許翁墓誌銘

翁諱真常許其氏梅鶴其號無錫方湖里人父敏母陸  
氏生而骨相奇偉弱不好弄識者異之時洞虛知官陸  
靜淵者為翁母舅遂依而學焉陸之徒為龔太冲氏龔  
之徒為范玄機氏翁禮為師既乃學祈禱法於太冲學  
攝召法於姚端本學齋醮法於湯應泉學養生法於四

方之羽流由是名譽日起翁尤嗜儒學初從余伴讀季  
樞得書史大義後益奮勵於古詩取諸陳遜庵天澤律  
詩取諸高梅庵惟清雜文取諸吳管窺鵬舉真行書取  
諸陸竹石懋成恒以緣飾教事平居文雅莊重見者稱  
有德容焉會道會缺衆以翁舉同輩欲奪之郡守龍侯  
晉試以文翁援筆綴數百言其論遂定在官若干年取  
重自躬部使者暨郡侯縣公無不加敬張真人嘗以觀  
過翁逆之甚恭真人改容禮之謝事後益究引年之術

聞武當之勝嘗三往遊尋訪古跡及名流異方皆有所聞而還始從師居城南祠山廟後復居洞虛宮雷神祠皆有脩建功晚益好靜恒焚香燕坐觀史賦詩以自適或與客圍碁當其興趣所到岸幘長嘯自謂神仙中人忽病數日卒於是予方東歸聞而哀之其徒范景辰將以是年冬十二月八日葬翁惠山河許之原乃以吾友茹少叅世和狀介周雲漢來乞銘惟吾先大夫純和公與翁游最密予故以執友事翁雲漢始從公數十年公

知其有志儒學遂遣從俞御史世德習禮經束脩之貲  
樂為之助論者謂翁有歸儒之心故於雲漢贊之決不  
然道不同而能為謀如是也哉某以是重翁惡乎不銘  
翁卒正德五年正月某日距其生宣德某年某月某日  
享壽八十二徒一人即景辰景辰之徒四人某某某某  
銘曰雲衣星冠尋真名山蒼顏碧瞳虛往實還儒有夙  
心晚嗜益深乃謂其徒脩贄士林鶴鳴梅開翁招不來  
白雲悠悠翁在瑤臺

鄒以升配王氏墓誌銘

王氏諱瓊字潤卿常之武進人故南京吏部尚書贈太子太保諡文肅思軒公女也其兄為都憲公希曾其歸于鄒為堂字以升配以升霜檜翁某之子宋忠公弟進士洄十幾世孫錫之言望族者歸焉王蚤失其母某祖母朱太夫人實鞠之長教之小學女誠諸書及古今格言皆能口誦事繼母孫夫人以孝謹得其愛既歸以升姑周氏已沒事繼姑鍾如事孫夫人既而霜檜處分諸

子自為別業蠡湖之上蓋去故居半舍許王晨夕饋於  
鍾以達於翁猶在堂也越若干年翁暨姑年皆高以升  
迎歸凡服食王必先時備物得其歡心自奉儉素嫁時  
珍綺屏去殆盡惟鄉族是從談者以為難於是文肅日  
貴顯第宅服御之盛甲於郡中王嘗纁卉歸寧儕輩或  
謂其過王以分謝之終不為變平居佐以升重祭敬客  
勤耕博藝不亟不徐務歸于義以升兄弟數十人王皆  
禮之於同母者加焉或問之曰不敢忘吾姑也業諸子

女訓必以幼率必以躬每誦古常語曉之蓋以升之家  
政稱理者凡若干年衆而無譁黷而無擾逆而無躋周  
旋默相王之力為多初王聞其兄都憲公沒于官哭之  
慟及姪中書昇病就醫吳中乞見為訣王冒風霧往自  
是遘疾數月遂不起姻里聞訃有流涕者王生景泰三  
年六月二十有二日卒正德四年十二月二十有三日  
得年五十有八子男三長欽次鎔太學生次鉦娶皆華  
氏女二皆適華長婿鯨蘇州衛指揮次訓太學生孫男

五人女八人以升卜以卒之明年某月某日葬王于其

鄉

闕

新阡乃奉戶部郎中錢君世恩狀來乞銘予知  
文肅公之家政舊矣今徵之銘曰闕睢之風葛覃繼之  
勤儉孝敬允為女師此有令人孰曰未學我刻銘詩以  
配古作

明故承事郎思本朱公墓誌銘

吾郡稱善教子者邇年來以思本公為之最公之子今  
通政司經歷晁蒞任有聲封典將及而公沒知者惜之



公善居第崇鉅堅朴如其為人先卒之數月火幾盡既而訃至知者重惜之時予督漕師入朝吊司經於京邸司經乃奉何戶部孟宜狀來請銘某之曾祖母公之族姑也於司經素有斯文雅其能辭于銘邪按狀公諱斌字世昌姓朱氏別號日新晚更號思本常之江陰人其先有諱良璧者實晦庵先生從父行宋宣和進士官鴻臚主簿從思陵渡江家於晉陵十傳至均寶始遷無錫則公之六世祖也均寶生浙江提舉光遠光遠生紹興

知事子昇子昇生士銘入國朝為江陰之宗士銘生善  
慶善慶生維吉號梅月正統間以孝義旌門景泰間被  
薦授脩職郎通政司知事其配鄒氏實宋忠公浩十三  
世孫有子二人公為仲質直好義博學善為詩嘗從父  
京師終日侍左右無倦中朝卿大夫賢之贈之詩歸與  
兄世寧居友愛敦篤庭無間言既而以父命出居西偏  
朝夕承歡不以遠故少廢父沒殮葬以禮徵銘集誄碑  
板盛傳談者侈之先是景泰甲戌嘗出粟千斛助邊受

服如例成化丙戌饑復輸粟錫璽書旌門繼加承事郎  
公感激圖報凡義舉若脩學築城造梁之類必為民倡  
郡邑長吏亦必以屬公論者謂公受異褒於是為稱其  
御家內外井井僕數百人因能授事各有紀綱公總其  
成勸勤懲惰政若公府處姻族率以恩勝義與人交敬  
而信恭而度故無尊卑踈戚皆敬重之雅好文學雖家  
務叢牘不廢講論其教司經尤加之意聞有博洽士不  
遠數百里必延致之館穀問遺儀物無至司經既得鄉

舉猶課督不衰孫承爵生公蠲逋租數千斛以志喜及  
長為邑諸生卒業南雍稱好古學公因而進之期遠到  
焉初公立門戶有軒特之稱中而坦然終而退然雖或  
侮之弗較也君子謂公於是乎哲司經之初授官也屢  
以公病乞終養公口授家人謂宜勉供事不得顧家及  
遭火變又以書慰之歸之數而已公生宣德壬子五月  
二十二日卒以正德四年九月三十日壽七十有八配  
長洲惠氏先公二十年卒繼同邑何氏子男一即景女

四徐渙楊維何桓邵天民其壻也孫男一即承爵曾孫男一伯曾女二長未聘次許聘何應辰墓在邑東慶雲磬石山之原蓋祖塋地公嘗於是營壽藏惠氏卒葬焉司經卜以某年某月某日啟而葬公銘曰古有世家命由國君今也則否自我高門大江之南世家者幾朱稱文林為鄉之紀家有偉人曰思本翁幼學老傳以義始終孰不教子翁心則篤維詩維書以似以續國徵文獻惟家亦然或觀民風視表于阡

承事郎慕菊朱君墓誌銘

君諱暄字朝陽姓朱氏別號慕菊世居錫城南石洋里  
高祖壽義曾祖彥昭祖士原父本字文立號菊莊有鄉  
行母蕭氏君幼岐嶷從里儒華適安游讀書通大義尤  
好觀史每見姦邪誤國處輒抗聲罵聞者壯之甫冠兄  
曦卒府君外應門戶內事菊莊極謹初菊莊為良稅長  
老厭於役君力為謝之疾而懇禱喪而慎斂葬而備窆  
且有終身之思以父愛菊歲時對菊輒感傷不已慕菊

之號以此申祠堂之規謹墓祠之節視菊莊不少替姊  
妹四人既有家而業衰君悉周恤之若宗姻有大事求  
無不應戚者有加賢者又加焉或售產券求益再三與  
之菊莊存時雅愛客客至必留飲飲惟勸酬微醺乃已  
不效里俗為諠譁態庭有牡丹數本歲為賞花之燕旬  
日始罷府君繼之每舉加盛又為巨舫遨遊溪湖間號  
曰野航錢希翁為作賦然性疎率與人談笑洞見肺腑  
往往面折人過過而能改則又稱道不釋口嘗罹橫逆

君知其人姦賣田以貨之後數歲節縮經理卒復其田  
既應令助賑受七品官階乃以家事付其子而閒適以  
老所居近郭多野趣前有沼植蓮其中為亭曰水雲東  
為觀稼樓各以其時居之如是者若干年卒卒之日為  
正德戊辰十月三日先是遘疾自度不起治命甚悉大  
抵皆勤儉忠厚之語君生正統二年丁巳九月二日享  
春秋七十有二娶楊氏子男一弁女一適華汝器季子  
戶部書筭世明孫男二某某幼孫女一許配侯陽華某



升將以卒之又明年十二月十八日葬府君祖塋之次在所居後左銘曰菊云菊云隱者尚之兩世一德再培而滋采蓮南池觀稼東閣吁嗟若人不可作矣九原有知無亦謂夫斯邱之樂也乎

東耕處士楊公墓誌銘

東耕楊公吾從母之夫也楊於錫為望族蓋世長鄉賦若有政焉茂林景信在宣德正統間尤以惠稱於公為曾祖祖曰汝潤者公父也其性曠逸不羈以輕信人故

負公緡甚多於是公方學于傅書史有程矣即毅然以  
代勞為任百方營補數年而後克完有司用法困辱叢  
至母潘氏卒出則就理入則當喪能不以厄廢禮衆憐  
而壯之既乃謝稅役與其配過孺人檢內外貲產葺殘  
經牘加以節儉又二十餘年而故業復中遭祖母朱及  
汝潤公之喪皆力為葬具念母早喪隆禮於舅氏甚篤  
舅儒醫也諸子克世其業與公相師友婚嫁子女時而  
當物愛其弟妹恩及甥姪雖居城市非慶吊不出客至

必留欸竟日談古今事亶亶忘倦酒酣吟哦意氣動人  
君子謂其有國初諸老之風時公年五十餘張御史淮  
巡按江南重耆老之舉郡縣強公為之未幾求退其效  
謀持斷公平著于上下者視稅長時為多然自是多居  
鄉躬閱農圃東耕之號以此凡歲積與里人共歛散豐  
收不以時趨利鄰嘗火至公廬而止群盜煽虐戒母公  
犯晚受仕者服應賑饑令也親黨論曲直者咸質平焉  
公性直諒與人交無留言隱意識者謂公古逸民非今

人也使人人皆如公安用官府為哉公聞而謝之公諱  
旻字日初壯以字行過喬出宋徐王郡馬孟王子男二  
人槩娶過即母族繼趙宋後諸孫也楷娶殷為方伯序  
賓曾孫女一人適永康丞成景高子瓚早寡有貞行孫  
男二人楷之子淮邑庠生娶高沅州孫女槩之子汴亦  
聘于過女四人其壻長為庠生莫同次為陸南康子術  
又次為張黎平子琳琳始聘又次者幼公卒于正德戊  
辰二月十一日距其生宣德甲寅十月二十三日為壽

七十有五葬以卒之又明年庚午十二月某日墓在邑西龍山河澣之原從先兆也初公之卒寶在浙藩將之湖南聞訃而慟有未能會葬之嘆乃今幸獲臨穴且以槩楷請執筆為銘實寶志也其事實所逮見及聞長者言其詳則徵諸王元信所為狀云銘曰為士為農為商之質為夏之忠惟變乃通幹蠱於初履坦於中卒也缶歌是為君子之終

奉議大夫湖廣按察司僉事姚君墓誌銘

湖廣按察僉事姚君秀夫既卒之二年其子伯生狀君  
事來請銘予與君同舉進士相知為深昔在貴溪予既  
吊哭之銘固弗容遜也君諱文灝秀夫其字自號鄱東  
野人晚更號學齋世為信之弋陽人其先有自立者徙  
貴溪東山至本正始膺貢為太學生君曾祖也祖添德  
父明以鄉貢進士官監察御史陝西按察僉事配王氏  
生君年二十領癸卯鄉薦甲辰省試第二廷對賜同進  
士出身授工部都水主事督造淮安運舟改刑部陝西

司調常州府通判遷工部都水司主事督浙西水利以  
病告家居起為刑部廣東司主事擢今官提督學政三  
年而卒初君侍父于陝時方弱冠讀書恒達旦見者知  
為偉器及歸娶獨行親迎禮流俗咻之不顧父喪極哀  
毀內翰張公東白謂人曰是子可以語道矣勵志問學  
能忘其貧文譽隱起比有祿迎母就養京師踰年母歿  
歸其喪葬之廬墓終制其督漕舟處置得宜軍民稱便  
在刑部纔三月坐累當調外或謂任淺宜自白君曰職

既在是即一日亦與有責敢獨免乎言者愧服常州水政先諸郡工部侍郎徐公貫奉勅視水浙西君陳興革事皆見施行還朝上君治狀遂有工部之命君既受命亟陳水利六事一曰設導河夫二曰發濟農粟三曰給脩閘錢四曰開議水局五曰重農官選六曰專農官任鑿鑿盡皆經久計朝議行其四事君巡行相度雖極險遠忘其勞繪水道之圖人謂之確集水利之書人謂之備其自著又有事宜一編皆行於時及歸大巖下益事著



述提學命下輿論允協君慨然以作人為任條教甚悉  
大要本聖賢之學而叅以時制痛革浮靡考校一斷以  
公自謂毀譽不入請託不行賄賂不通聞者以為不誣  
甲子之試凡中式者皆公所擬侍御包君澤歎服其精  
而公不及見矣君性方嚴純正平居寡言笑在官無貳  
志在家無嬉容友諸弟兼有情誼接人敬人亦敬之臨  
事剛毅充其志雖死生在前弗顧也自始仕至卒每公  
暇端坐手一編儼如儒生諸經書皆有辯論或欲更訂

大學章句公謂宜守程朱定本至其獨得時又自附當  
仁之義非有識者不能深知也公所著有學齋吟藁文  
藁經說雜說報德錄中庸本義諸書藏于家公之卒也  
其配樊安人携伯生歸試君以後事屬二三寮友殯斂  
周謹君子謂君忠誠感人至是益驗云君生景泰乙亥  
五月二十三日卒弘治甲子七月二十七日年止五十  
葬為正德丙寅十月一日墓在邑河潭龍山之原子一  
即伯生孫一曰仲賢銘曰刑名水利用儒為吏吏未盡

儒儒有餘地我著我書靜退之餘奮其往如為君子儒  
湖南之教少徵儒效粹如其文於德有耀充君所志當  
止於何考言較功其得孰多龍山之麓英靈攸復我銘  
不磨中有貞玉

華室鄒氏墓誌銘

鵝湖華允昭將葬其妻鄒氏乃屬其族弟珉書來請銘  
于予珉予甥也道允昭之意甚勤既以吏事辭至再三  
請乃諾而銘之按狀鄒氏諱某字某其父曰靜脩處士

佑之生若干年歸于華為會通公子婦其配允昭名奎  
於行為仲佑之公華出也復娶于華故歸焉重世煙也  
鄒氏天質貞順幼承內則夙有儀度其在華氏若干年  
事其姑錢堂謁室饋進退庭階無少愆違平居寡言笑  
妾媵稱仁奴僕稱義於允昭得相之道允昭亦賓遇之  
成化間允昭以訟北上遂服淡食素至成憐疾鄉人談  
之嘗生女而天恒以嗣為憂後側室生子曰是即吾子  
其知大義如此故有疾以姑之喪而劇是時父母繼喪

母兄弟六人喪者五矣至是不勝哀遂至大病臨終無  
他言惟不欲金帛殉葬云鄒氏卒弘治乙丑九月二十  
五日距其生天順己巳得年四十七子一曰鎔女二葬  
以卒之又明年正德丁卯某月某日墓在西壽山先塋  
之次華出南齊孝子寶至允昭若干世鄒出宋忠公浩  
之弟洄至靜脩若干世詳在其譜銘曰憂而惕喪而戚  
而視庶猶適維惇于心乃至斯極忠門之孫孝門之嬪  
貴不以族維其人兮

徐府君墓誌銘

府君諱又字宗俊別號浩軒其先為宋節孝先生積之  
裔蓋數世至彥京者始自蘇徙吾錫以鉅族稱於招義  
鄉彥京生惟育惟育生景徽景徽生元德厥家始大晚  
以輸粟授承事郎尋復益之旌其門曰義民承事娶於  
張生府君弱冠時父命治別業極力經畫堂寢門庭整  
而有度識者謂其能家長司鄉賦征斂不苛民甚德之  
入事父母尤善伺顏色以勤儉承意若甘旨之奉則恒

事不論也母嘗念府君獨勞公事欲分任於兄府君辭以分當爾且曰弟事於公兄事於私奚獨勞之有及父喪愛兄彌篤久之勉從兄命析居其析也凡百就其薄者至於書策皆以畀兄之子人尤多之御家衆以公食指千餘無敢譁閼施及鄉鄰救菑恤患吊死問孤遇歲饑減租增貸有德惠焉或勸入粟補官不聽布素終身畧無慙色性不喜綺靡獨與賓客飲則浩然暢懷因號浩軒淵默鯁直平居似不能言臨事剖析侃侃如也病

且亟以勤儉訓其子甚悉語畢乃瞑時正德庚午六月  
二十有八日也距其生景泰癸丑八月十有五壽五  
十有八配章氏先卒繼黃氏子男二長言義官次奇女  
一適義官江陰張堦孫女二言等卜卒之明年正月二  
十日啟章氏兆合葬以吳君大章狀託吾弟璣以墓銘  
請乃次第吳狀為之銘銘曰古稱本富力穡服田加之  
行義尤謂卓然吁嗟徐君吾表其阡烏呼賢哉

玉亭處士張公墓誌銘



予按察兩浙時公以小像命為贊比歸自漕臺見公猶像中也方以耆逸為公慶未幾公病久之訃聞且聞其沐浴更衣焚香正寢乃瞑先是命其子輅悉而無亂類有道者既而輅以其從弟鄉進士汝欽狀來請銘予祖三益府君與公同為楊氏壻公予祖行也銘烏敢辭按狀公諱復字善初姓張氏其先泰州人十世祖福宋國子助教從思陵南遷遂籍于錫五傳至天騏生士英士英生用謙號止庵醫術妙一時娶于丁生公幼能自立

終日手一編不釋人以為有公輔器或勸業進士止庵  
曰隱吾世德也遂以所著醫書要指遺之曰汝第事此  
公受而攻焉學大進求者沓至公性簡重惟親舊則一  
往餘以方與之亦無弗效者家故有田僅足歲用無他  
經紀蓋廉德與醫名並傳人謂止庵有子居父母喪以  
禮襄事於是弟某方幼愛而教之值病乃已平居莊敬  
自持雖盛暑必冠服見客客問則對皆有理致否則默  
默而已家藏書畫最多醫方倍焉觀其志即重貨不願

易也有司以鄉飲請公辭之陳方伯晉庵輩為社會以公至為歡既老而傳即後圃構一亭植竹數竿獨坐自適間與客坐竟日不及酒署曰玉亭蓋謂竹也錢太史福以公之德似之著之於文弘治壬子饑出粟應令受服每適野野服如故配楊氏義官汝威翁女慈婉多內助子一即輅初事舉業後以醫名女四長適寧鄉訓導馮夏時次適陳用時次適庠生殷佐次適義官朱珣孫男拱邑庠生曾孫男一朱公生宣德九年二月十九日

卒正德五年八月十一日壽七十有七葬以卒之明年  
二月某日墓在邑開原鄉大池之原蓋公所自卜云銘  
曰其人如玉太史則云生居以亭歿瘞以墳惟輝燦如  
孰不見聞後有徵者請視予文

承事郎殷府君墓誌銘

府君姓殷氏諱廣成別號雲溪其先晉荊州刺史仲堪  
以守郡占籍無錫嚴埭鎮歷千餘年至國初有德徵者  
生子實始徙邑中定花版巷子實子序永樂甲申進士

累官至雲南左布政使得贈二代俱如其官于時再遷  
今城隍廟西公配夫人戴氏生璉字尚朴娶於周生子  
五人府君為長公以佳孫自慶日置諸膝飲食必先焉  
且教以幼儀稍長為尚朴翁幹蠱暇則歌誦古詩以養  
性情若世事亦旁究弗遺翁嘗被逮刑部獄府君從之  
行能專對問者見者壯之歸任門戶事不以煩諸弟比  
其冠婚皆自備禮適歲歉戴夫人在堂府君輔翁供事  
及卒歛葬如禮雖兄弟析爨事翁益周歸妹撫弟施及

姪甥情愛周洽中歲家漸裕教子以業則農賈兼事以  
學則師友兼隆卿士大夫謂布政公識府君於是乎驗  
當時姻戚中若盛中丞冰壑貞人也錢偃師孝常介人  
也厲青田文振狷人也皆重府君有疑以質焉晚以遼  
陽軍興例輸粟得七品散官蕭黃門文明實舉之歲鄉  
飲請列三賓多辭不赴常乘一小舟于溪山間極遊觀  
之適又於水南為小溪山客至款洽終日晉庵陳方伯  
作真率會府君與焉後諸老散謝府君獨優游如故衆

方羨之而病且卒矣正德庚午八月十三日也時仲子  
佐試應天聞而趨歸得奉遺命云府君生宣德癸丑閏  
八月十四日為壽七十有八配馬氏先十年卒子男四  
長俊次傑次即佐次脩佐邑庠生俊傑脩皆七品散官  
女一適太學生施閏早卒孫男五長奎次璧皆庠生次  
獻次金次阿六女八朱珮過輒鄒孟楊濬吳恩陳禪秦  
瀚其壻也俊等將以卒之明年辛未三月某日葬府君  
於舜柯山先塋與馬合兆佐乃自為狀介潘君繼芳來

請銘銘曰今布政使古稱方伯殷歷三藩九考厥績若國在昔邑論世族舍斯而何君方伯孫士行則多壯而恂恂老而番番鄉德惟歌我銘幽堂吁其不磨

明故四川新寧縣知縣加封文林郎晚樂茹公墓誌銘

正德五年六月十有三日晚樂公以疾卒于家其子福建叅議鑾聞訃歸與其弟鑾鑒卜卒之又明年壬申某月某日葬公惠山西北嶧喇祖塋之次叅議姻友於予



最久故以銘屬俞給事國昌實為之狀予素知公固不得辭也公諱玉字璧英姓茹氏別號石牕以勅詞有晚樂田園之褒故更今號公之族世為錫望勝國時曰良夫者以積善稱歷循仁文達皆敦行義文達之子洪國朝永樂中以諸生被徵脩大典諸書書成授壽光丞卒于官配陸氏以幼子璿歸有貞操正統中詔旌其門璿娶周氏生子三人公為之長公體貌端偉而性尤敏慧自八歲入小學至十二治書經為舉子業日有所進嘗

以家藏舊琴按譜彈之宛得古操十五從都憲冰壑盛  
公游繼又資諸馮叅議麗庵唐教諭主一劉知縣梅堂  
三公且廣擇友為講會比入邑庠每試輒優等為同輩  
所推居父喪以禮君子重其行數舉不利乃以貢入太  
學遭母喪喪畢而起備極困乏而志益強又若干年年  
五十二選官得新寧於是叅議舉應天鄉試公奮曰吾  
父子蒙薦國恩厚矣敢不力圖報稱既至官賑窮恤孤  
鋤強扶弱凡諸利病次第罷行之民翕然以歸時有鄰

警公請城焉雖勞且費不恤有計遷學以易地者公發其隱寢之然雅有逸趣年六十二即致其政歸及叅議登進士公受今封乃以家政屬次子鑒鑒別室於所居西偏靜究引年諸書有方士至必延與論議皆謂公有所得矣而觀者亦以貌力稱其言云公生宣德五年四月十四日壽八十一配金氏子男三長即鑾釋褐知唐縣五遷至今官次即鑒鑒皆七品散官女三陳時雨夏從桂施泰其壻也孫男五霆早卒霽霆霓霽女五嫁者

三壻李棠鄒立袁渭許嫁者二壻盛某鄒某曾孫男二  
繼宗衍宗俱幼銘曰士有民社是謂志行罔曰邑小大  
者是徵仕始五十六乃老君子謂公見幾之早哉哉  
嶧公昔所遊龍章寵賁成此一邱

明故景婁處士錢公墓誌銘

公諱清字孟清姓錢氏別號景婁無錫人也其先蓋出  
吳越忠獻王王曾孫某始由嘉禾遷無錫七傳至裕而  
族始大裕之孫曰彥春元永嘉書院山長公高祖也曾

祖伯剛祖公達父惟常世有隱德惟常配鄒氏生公甫  
二旬而鄒歿公鞠于諸母稍長從周誠齋先生游敬而  
能勤日課外涉獵群籍尤熟小學性孝友自能言詢得  
母儀容悲慕不置屢形夢寐父疾刲股者再皆有感及  
喪歛葬如禮而哀毀過之復裒銘志之類為書以傳所  
謂遺芳集者是也庶祖母姚寡居踰二十年公白于官  
以聞詔旌曰貞節弟孟深蚤世以次子模後之及諸幼  
弟均為立產成室祠堂之禮品式具備躬率子姓春秋

墓祭忌日寢祭哭泣終身生日不受燕賀至老猶然周恤貧乏篤於私好助官賑民饑者凡二正統庚申出米二千石朝廷有義民之旌時公尚少實贊其父惟常公為之景泰甲戌出米三千石公獨為邑人先自是益樂施予內外二族及鄉之親舊待以舉火者數十家為糧長費不及民顧有助焉常製藥以濟病造棺以濟死立義塾以教人子弟其治道路建橋梁歲有之不可勝錄公儀容豐偉衣冠朴雅望之人皆知為重厚長者表然

世族楷範聽其言簡而度即其行端而恪罔不起敬性好賓客江左知名士多與之遊有詞章贈遺動盈卷帙其趣尚所寄舟名水雲圃名寰瀛恒以古書畫自隨竒花異石不讓昔人所謂名園者邑大夫以鄉飲禮請輒辭之時有縣官不得見之稱問右有健訟者人必舉公為戒公益謙慎欲以柔道率物慕師德唾面事故號曰景婁云及疾作閉門不出者數月一日集諸子暨孫告以後事且有規言又三日而卒公生永樂丙申十月某

甲子卒弘治壬子十二月某甲子享年七十有六配邵氏繼孫氏皆先卒子男三俱義官長楨娶華氏次即模娶何氏次棟娶司馬氏女四孫男十楨等卜以癸丑冬十月某甲子葬公于邑西開化鄉軍帳山先塋之次二配合兆奉其從叔父孟洪君狀屬從弟今禮部主事世恩請于故少保瑯臺邱公為表其墓復以寶在姻屬俾之銘謹叙而銘之公嘗授義官而鄉先生題墓曰處士本其志也銘曰處士之業好義而濟復有群行忠信孝



悌以義而官有莪者冠考公平生匪直一端所未滿者  
公身在野公實樂之時豈公舍孰題厥阡君子曰然有  
徵斯銘後千百年

夏室周安人墓誌銘

周安人吾姻友戶部郎中夏君如山之室也正德戊辰  
七月一日卒于習禮里第又明年庚午某月某日葬于  
范莊先塋君自為狀使來徵銘君以弘治癸丑進士授  
工部主事累遷至今官凡若干年安人皆從之以君考

績受今封辛酉君奉命清屯田於山東河南於是君之  
父封工部主事訥庵公病君屬安人歸侍湯藥凡若干  
年訥庵卒安人任焉比君歸安人佐襄事以勞而病又  
遭子喪遂不起年止四十五按狀周夏皆常之江陰人  
周為宋丞相益國公後自洪州徙無錫陸豐元季有曰  
貞五者贅夏氏既盛而衰其曾孫良輔力穡以復遂與  
夏埒望良輔娶于王生安人婉婉溫惠年十八始歸君  
從游郡庠相之學歸事其舅姑甚謹每飯必侍既飯無

他言始釋然退若候他起居類是君凡三歸妹安人力  
襄其行至出已裝不吝其歸趙氏者天取其幼女而子  
之承姑意也及從君北行子楨方弱安人知姑意欲留  
雖甚愛不以自隨時時念之有服食物必致致必先姑  
聞者以為有禮居宦邸節用而整僮奴各事事無惰蓋  
君疎於治生故安人助之然事無大小必請於君君喜  
賓客席無虛日觴豆所需未嘗缺緩或先意而具視事  
舅姑時蓋裕如也及其病也兩婢扶掖猶視家人婦治

膳曰養不躬雖豐非禮嘗以是自恨且痛其子學成而弗年故病日劇先是兩為君置妾至是謂曰吾病必不起即延數年君則衰矣再娶益晚乃謀娶同邑徐氏為貳室以同生視之徐亦事之如其母卒以姑養託焉姑包氏封太安人安人諱某子一人即楨娶某氏其別出子二曰某某孫男一人曰霖銘曰鼎則有味琴則有聲既和且平德焉是徵家利女貞胡彼階厲我銘令人此有餘地

司馬孺人墓誌銘

司馬孺人為錢君世梁之配錢吾錫望族司馬邇於錢而世通姻焉孺人父廷駒母陳氏廷駒早世無子女惟孺人已受世梁聘乃議後者立其弟之子曰趨時孺人尚幼哀痛中時為寬言以慰其母處趨無異親弟宗老頗異之稍長從女師授孝經列女傳能通大義剪刻裁製尤多巧思及笄將歸于錢其祖以衡顧曰吾老趨且弱而人行則門以內事孰與輔吾婦者不如因館其壻

於是世梁貳室於司馬氏司馬氏之業益裕而理者蓋  
世梁之力而孺人相之也既而其祖卒趨長有立世梁  
乃以歸養謀諸孺人孺人曰妻從夫婦事舅姑禮也昔  
以俗處變今以禮復常不亦可乎世梁遂白於陳以孺  
人歸奉其父景妻翁命居馬橋別業馬橋去世梁故居  
五里而遠歲時月朔孺人省問必躬無愆期無違度迎  
母就養在錢如在司馬者閭政日脩上下左右恩煦義  
肅世梁無內顧焉孺人既多育猶以似續未廣益為世

梁置婢有婢產女欲棄之孺人親抱持以全其生繼姑  
孫病痰劇孺人驚趨視亦病後孫歿孺人扶而往哭哀  
甚歸竟不起弘治戊申七月七日也世梁卜以卒之六  
年甲寅某月某日葬孺人於邑西開化鄉軍帳山祖塋  
之側先期以事行告吾友周君雲漢屬為狀徵銘於寶  
寶之再從祖姑世梁之嫡母也知孺人久讀周君狀而  
益信故為銘孺人諱某字某年三十有七子男七讚先  
卒次諤諤譚天相天澤天瑞女二某嫁邑庠生鄒諫某

別出受王某聘孫男一永齡女一永秀銘曰始從以俗  
終歸以正於婦道也奚病死而可銘我最其行

明故勿齋浦府君墓誌銘

府君諱璫字文璫別號勿齋姓浦氏世為無錫人宋建  
炎中有曰仲良者居邑之馬橋富而好施其子曰克明  
生名遠入國朝籍前澗族於是始望名遠季子宗賢以  
事歿京師遺孤彥溫母氏鞠以長鄉人稱之君祖也彥  
溫長子汝澄尤號謹厚娶呂氏生君垂髫時即有器局



稍長從鄉先生講書史知大義年二十遂涉左氏春秋  
及它經傳皆能記憶對客讎論上下古今如目前事事  
父母曲有禮度母卒終喪猶哀父喪如之治家勤儉痛  
刮奢習衣簾茹澹為子孫倡嘗作書戒之曰吾聞兄弟  
翕而後父母順汝等其協乃心力無自生侮或以利而  
致鬪訟縱遁于法汝心安乎況法決不可遁乎且勤則  
成怠則廢為學與理家一也知孝者當有所務矣其朝  
夕常語亦以此旁通醫術不輕施用惟病而無力者予

之藥多驗故嘗蓄以待求焉天順中鄉民遭水患多就食其家或以竊財事覺衆曰斯人無狀盍聞諸官君曰饑寒故耳何足較也又有負人財將鬻女以償者憂形于色君問焉為之代償如數強賊匿于鄰鄰弗知也既而捕者至賊將誣以知情鄰懼來告君曰汝執送官彼誣焉用哉不果誣嘗道見遊僧刺指血寫佛書者君責之曰自殘以惑衆如父母遺體何即標之使去其嫉邪如此君年既高邑大夫以鄉飲請則謝曰德與年稱斯

可有年否德吾敢與乎今上改元詔行優老之典或勸君冠帶君笑曰詔例固然吾年與德何以堪之正德己巳九月君疽發肩歷數醫轉劇乃集諸子孫申以平生之訓且戒勿用浮屠語畢而逝是月二十九日春秋七十有八娶顧氏繼華氏子男三長億義官次兆次穉女二長適呂樾次適黃訓孫男十二長穀次積太學生次穉次稼次禾次稠次穆次秩次穆次稔次种次穎女五曾孫男三女三億等以卒之四年壬申十二月二十日

葬之于其鄉石室山之原先期奉羅建寧文徽狀託吾  
姻吳鯨氏請銘予雅聞君之行為之銘曰士有逸遺乃  
身在野義形于詞尚論古者澤弗遠施止其鄉辟彼  
澗泉引之則長遠觀其孫近視其子我銘不誣輿誦如  
史

茹室女壙銘

成化癸卯正月庚戌新寧令茹君璧英有季女在室久  
病而死其伯兄鄉貢進士廷和聞于南雍慟哭馳歸既

寓書報新寧遂以其年八月某日祔葬于龍山祖塋之  
殤位仲兄廷貴亦自新寧來會葬先是廷和圖銘于予  
予諾之予何取乎而為銘也廷和之言曰吾妹生幾年  
吾父以國子待選京師即侍吾母金孺人以隨既而病  
足痿醫莫能興居幾年吾父有新寧之選始携以歸當  
之任以蜀道險遠吾妹隨行難於是鑾將卒業南雍乃  
留于家依我室相顧悲咽而別吾妹慕父母不置病屢  
以劇今年春遂至于大病年止二十四嗚呼哀哉吾妹

慈惠幼成婉婉有儀平居聲不聞于壺外中饋之事代  
母之勞為多纖縷文繡精巧過人吾父母愛之思得良  
士而嫁焉然而不幸值奇數以至于斯且生之日什五  
疾病死之日不得見父母兄弟以永訣重傷吾妹心嗚  
呼哀哉今也骨肉歸土不能為懷惟是壙中之石宜有  
以志子其念之予感其情是以諾而為銘也銘曰瞻望  
父母蜀道長只幽魂飄飄心孔傷只比時具物葬有兄  
只雖則傷只亦尚康只

鄒本忠妻錢氏墓誌銘


錢氏鄒本忠妻也卒之幾月嗣子某之父爲介其塾賓  
吳宋卿來請銘曰某孩提罔知敢代以請越數日又偕  
錢之弟元玉來其季國子學錄潤中君實友於予故諾  
而銘之錢諱淑潤錢其氏出吳越武肅王鏐勝國時自  
臨安再遷至無錫新安鄉國朝義居處士公性者於錢  
爲曾大父服習禮義有古君子風大父惟心克世其德  
父應機母湖塘蔣氏長歸于鄒爲本忠配本忠名秉衷

宋忠公浩之弟進士洄之後由晉陵徙無錫泰伯鄉世  
尚隱節力本以富其家入國朝桂堂柏軒約齋三府君  
居龍涇上尤為族望錢幼具四德讀孝經列女傳通大  
義母嘗病且危錢侍湯藥至廢寢食夜率二弟露禱北  
辰母疾遂愈及其歸也年甫十八上下翕然宜之不二  
載秉哀病疹以沒錢慟哭幾隕既畢葬事奉姑周氏晨  
省昏定日以為常姑性雖嚴能得其歡心已而姑憫其  
無子勸以再適錢不答至再三言之則誓死以謝後姑



老命與諸叔氏異產錢讓而後取既乃以禮繩衆課耕督織內外肅如業日以裕拯饑恤寒里鄰婦女莫不感化若其順德行於娣惠心孚於妾媵者又恒事不論也姑亡後悲思成疾力為殮葬一日疾作就枕月餘乃卒初子叔氏秉倫子玄恩五歲而死至是自度不起立某而暝某方二歲於錢為再從子云卒之日為正德己巳十一月六日距其生天順壬午二月一日年止四十有八葬以卒之明年某月某日墓在寧山之原合秉衷

兆銘曰死知立後孺泣者孤九原有知無報厥夫婦不  
貳適為貞為孝嗚呼慶門孰曰不吊



容春堂別集卷七

欽定四庫全書

集部

容春堂別集卷八

九

詳校官監察御史<sub>臣</sub>曹坦

中書<sub>臣</sub>劉源溥覆勘

覆校官中書<sub>臣</sub>康儀鈞

校對官中書<sub>臣</sub>楊世綸

謄錄監生<sub>臣</sub>馮曰琮

欽定四庫全書

容春堂別集卷八

明 邵寶 撰

墓表

六首

碣銘

二首

傳

三首

行狀

一首

明封太淑人張氏墓表

太淑人張氏故贈都察院右副都御史前常德府學訓導致仕菊庄先生縉雲周公某之配後公卒若干年以弘治乙丑某月某日終于家先是厥子南以右副都御史奉勅巡撫大同今上登極上兩宮尊號太淑人進今

封至是都憲得訃東歸疏以例請得諭祭及葬葬有期  
謂某昔同官江西嘗獲拜太淑人乃屬文以表墓道寶  
辭不獲則受其狀而讀之按狀太淑人諱某字某其先  
湖廣江陵人其父曰楚正統間主縉雲縣簿時菊庄公  
方弱冠力學有俊聲縣簿公遂以太淑人歸之太淑人  
儀質端重德性純美孝敬忱肅慈惠懇洽事菊庄公自  
諸生至于有官及見都憲之成壽高祿厚禮秩有加而  
厥德益懋於周氏世望為稱君子論女則者必以太淑

人先焉今茲墓道之書所以風示夫人不宜縷舉寶特  
論次其一二大者初太淑人之歸菊庄公也遭家中微  
敝廬薄田衣食僅充衆謂必不能堪太淑人入門即與  
妯娌同勞逸無幾微驕態烏乎貧者士之常當今之時  
蓋知者鮮矣若太淑人厥惟賢哉菊庄公性剛毅處族  
姻寮友有過輒面折不少貸太淑人每溫言釋之甚則  
極陳禍敗事以相戒必已乃止烏乎忍濟容大非君子  
不及此若太淑人厥惟賢哉浙東民俗競崇奩貲養女

至二三輒不舉呱呱泣盆盎中有不忍言者太淑人相  
菊庄公生女六人一無遺棄諸子婦守為家法烏乎習  
俗移人賢者不免天性之親忍自戕賊雖為人實獸不  
若亦獨何心若太淑人厥惟賢哉諸子既長菊庄公教  
之極嚴或至傷恩太淑人曰吾觀兒輩異日各有成就  
第從容誘掖當無不化何苦乃爾烏乎父子不責善夫  
人知之而弗能自克若太淑人厥惟賢哉太淑人既受  
封家亦漸裕內媵外僕足備百役而祠堂時祭及寢墓



祭祀酒脯饌必手脩製極于潔腆不以委人自奉約薄  
無改于素其暇日織紵補綴每一燈至夜分以為常烏  
乎貴而能勤富而能儉古詩人猶稱美之若太淑人厥  
惟賢哉凡此數者非獨天質若有學力焉故有一已足  
書矧多有之而他行又有不勝書者書其大則小者可  
知也烏乎德一也而在女婦成之為難蓋姆教既廢脩  
飭由已非若男子之有師友相切磨也然德成而無賢  
夫子雖有令淑之實密于閨門弗克彰顯以樹風聲為

世教重始之難其難在已終之難其難在人惟太淑人始終一節人已克協以迓承天寵生歿榮哀無愧於君子之論某不佞願以是為天下道之太淑人壽七十九有男子四人長魯次即都憲次邦次易邑庠生蚤卒都憲由進士知六合縣擢監察御史按察副使按察使右布政使召為今官有學有政風裁自持偉然天下之望太淑人始封孺人今為再命云女六人者陳槐朱鑒丁淳李暹羊覃洪奎為其壻孫男曰某某凡十六人

烏乎盛矣是宜附書若夫塋兆方向及葬之月日有少  
傳姚江謝公誌銘在茲可畧也

陳母王氏太宜人墓表

正德元年丙寅八月十五日戶部郎中陳嘉言之母贈  
太宜人王氏以疾卒于家先是九年弘治戊午郎中以  
主事考績太宜人受勅封太安人又六年甲子又以員  
外郎考績太宜人乃受誥進今號某嘗觀在勅有端莊  
謹飭之褒在誥有禮義儉勤之譽大哉皇言足以彰太

宜人之德矣宸章煥爛被之穹碑昭揭墓道將永世無  
極郎中謂某昔同官相知又以表墓見屬謹按太宜人  
姓王氏父曰某母某氏世為無錫人幼聰惠嘗從父舟  
行遇盜坦無驚色盜果不犯而去識者已知非庸流凡  
女紅不煩母訓皆合尺度及笄歸于陳為贈奉直大夫  
戶部員外郎野葵府君配既入門執婦道事舅姑得其  
懽心於府君或規之或相之皆歸于正族黨姻友能言  
其事府君卒家道中替太宜人躬舂爨以撫諸孤夜則

絰綴率至四鼓乃罷子若干郎中為長命就學資給之  
需悉自己出不知其措之難也既而郎中學有成鄉人  
子弟請業者衆脩贄歲益而力勤弗怠及郎中舉進士  
授戶部主事屢迎養京師不從至分俸歸則曰我何以  
叨是賜哉每受必拜郎中三使過家皆旬日促行不使  
久滯乙丑三邊之使訛言有警頗憂之及歸曰幸矣促  
行益切但以明年七十期再見為言郎中不忍離也遂  
留其內子范宜人侍焉越四月疾不起烏乎吾聞仲尼

以先事後得為崇德然非知道君子未有不昧者故在當時猶難其人而況後世乃有女婦如太宜人者哉初太宜人訓其子之學也蓋知夫人必如是而後為人不  
知榮祿之在後也及夫封之既加養之既備則又競競畏抑惟舉臣職為其子勉而不敢自以為功前日之心於是益著由是天鑒厥德以成郎中郎中文行政績焯焯于時崇階厚祿生養沒祭華顯盛大有不期而至者君子考其平生允如勅誥之所嘉獎其為表也孰大於

是而尚假於寶之言哉某不佞因郎中之懇特原太宜人所以立心者敬文于碑為鄉人告府君諱璵字德潤野葵其別號孝友直諒孚于邑里愛讀魯齋大學要略及諸史略微醺命兒輩歌詩擊節慨慷有古烈士風濟貧恤喪能悉其力教子極嚴至引髮繫楹以警睡太宜人壽六十九葬以卒之某月某日墓在某地子三人長即郎中名策次某次某孫男女凡若干人是為表

南京鴻臚寺鳴贊月溪王君墓表

君諱顥字希程王其氏月溪其別號也世爲無錫人居  
邑西甘泉里高祖貴一曾祖仲圭祖伯啟父原敬號樂  
善娶于張生君君幼有志於學治詩經爲進士業樂善  
翁喜而進之翁卒君葬之以禮邑宰河間賴文玉聞其  
賢也聘爲師以教其子君出入縣解言動不妄賴宰益  
重之繼補庠生與陳戶部惺泉及張太守元之吳侍御  
遜之三公爲友既而各登第君略不爲動鄉邦多之若  
過太僕九臯輩出門下者數人雖貴猶執禮如故後公



援例應貢適有教職之選君辭以母老卒業南雍時太宰晉陵王公宗伯華容黎公司成金谿徐公咸稱重之比歸母益老君事之益謹母卒弟兄繼之君備物以葬念所居鄰邑治先祠逼狹弗得展敬乃遷城東新居為終焉之計於是年幾七十邑宰姜士元勸之就選故有茲命既抵任孫卿一見之以得人為僚友賀未幾乞致仕歸杜門非公事不出君善治產晚益饒裕作書屋于所居之右疊山引水雜植花竹堂曰成趣亭曰醉吟有

餘情焉仍集歌童數輩日與陳方伯晉庵諸公極過從之樂雖性不喜飲每會輒欣然忘倦賦古律詩往往有得意句其曰吾心拱北時時事願繼三王作四王尤為人所傳誦故題其堂曰拱辰云君平生視人猶已過輒攻之善輒譽之有疑必商確求是莊重典雅出言有章尤篤於教子嘗謂曰六經惟易理最奧不可不學乃遣其子卿從華少叅靜庵公游君親課督不少休暇卿應例入南雍君忽遘疾卿會得依親例歸君喜病為少差

卿侍湯藥數月卒實戊辰六月二十六日享春秋七十  
有六配李氏繼鄧氏子男一即卿女三長適義官張瓚  
次邑庠生莫愈次周普孫男三東秉采孫女一卿以明  
年某月某日葬君于惠山河澍之原旣得銘于張黎平  
而墓前之石乃以屬予遜之吳侍御實狀其行予嘗謂  
士大夫之於仕也知進非難知退為難知退而能樂之  
又難之尤者也若君者懷抱利器累舉累屈由例以進  
庶一盡吾衷於國旣而辭冗居散辭近居遠始上而遽

歸自適於湖山之間優游康適以至於老所謂退而能樂者非君謂邪予於是重之予在邑庠辱君忘年之雅寢門之哭旣舉于聞計時矣茲因卿之請復為之表以詔其後人俾有考焉

勅封承德郎戶部主事劉君墓表

戶部劉主事鵬監船稅于蘇也厥父封君實來就養于子幾以疾卒于官舍人或為戶部憾焉君子曰生養于子也沒殮于子也歸且葬于子也子之幸也何憾之有或

以慰戶部戶部哭而興曰幸則幸矣某敢自逭吾罪然  
有不朽可圖敢不勉於終於是既請銘于少傅守溪先  
生王公復自為狀介吾邑侯馮應奎以墓表見屬予嘗  
聞戶部之善於大司徒劉公今讀其狀知君有大節者  
二劉世居京師數世至君早失怙恃乃能自力於農每  
誦古人言則思企焉及戶部生曰此宜業士遂習舉業  
嘗誨之曰讀古人書當效古人言行用以此不用以此  
舍此倖進其能為人乎戶部用是砥礪經學舉順天鄉

薦登乙丑進士今為戶部有聲人以君為能父君事繼母李氏敬而忠終身不衰李亦感而加慈嘗曰何以報吾兒君垂泣謝曰吾父蚤世今見母如見吾父吾方懼事之弗周而敢望報乎人以君為能子吾嘗見世之人慈溺於愛孝衰於遠而君之為父子如此足以表矣乃若居喪也哀奉祭也豐撫姪也恩睦族也惠處朋友也義鄉之人稱之無間於家又皆有可書者吾特取其大節先焉以為後之人詔君諱華字世美其先山西太原

石州人國朝洪武初隸神策衛籍實居今南京永樂初分調今京師歷四世至君祖福源父聚母趙氏繼董氏李氏君生正統己巳二月十有一日卒正德庚午七月十有二日壽六十有二配王氏封安人子男一人即鵬孫女一墓在順天東安嚮口村之原其葬年月日則具諸誌云

明故封文林郎松滋縣知縣華公墓表

公既葬十又幾年其子辰州知府前戶部郎中津始立

石表于其墓哀經詣予請詞焉公受國封典厥有美褒而群行焯焯具銘諸幽為宸章輔某又何以表之惟公世出南齊孝子寶其來也遠生稟孝友之性於父母命無小大有劄記之敬母卒有毀形之哀父疾有由衷之憂妹與其夫歿有躬視之愛歿有殮殯營葬之勤此其行之大者或遇橫逆有自反不校之恕偕遣二子從明師補邑庠弟子有為國之忠津舉進士筮仕松滋有勤勞之勉及進刑部有欽恤之屬掄尅苞苴直鍛鍊羅織之



戒晚歲居鄉請浚秦塘有惠民之利及享分俸之養有知足之感終日尋繹漢史故事有慕古之念杖屨逍遙與鄉老觴酌有忘世之度又皆人所難吾書而詔夫鄉人蓋無媿辭焉烏乎天下之理感應盡之矣華氏若公以上世有隱德不圖其家之蕃也及公之父景榮翁贅堠山錢氏盡辭婦財而竭力營立亦不圖後之顯也今公旣封而其配同之子凡五人其一為名進士為賢縣令為材部郎為良郡守其名位且未艾孫男十四人繼

出仕途又未可量感應之不可誣固如此夫客有謁公墓而讀斯文者其亦有所感興也哉公諱暄字伯和壽七十有三其生也宣德己酉其卒也弘治辛酉葬為明年壬戌某月四日墓秦塘北原蓋從父兆公子五人者曰某某某某孫十四人

錢鴻臚妻惠氏孺人合葬表

是為鴻臚寺序班錢君世端之墓君葬後二十二年其妻孺人惠氏卒其子仁復仁術等啟而合葬焉禮也先

事具狀稽顙拜請予文其石表三而益勤予惟鴻臚之  
父贈奉直大夫工部郎中南邱公忘予年而辱與之游  
及其子戶部君益以道義相友至復術昆弟蓋三世矣  
知孺人之行有可訓於其後者其請也吾其能虛也哉  
按狀惠氏為長洲世族其先在宋有曰吉甫者由汴徙  
吳興其子天成再徙蘇之陽山稱陽山惠氏國朝天順  
間曰宗本者生以範娶錫之鵠湖華思源女實生孺人  
孺人二歲喪母鞠于繼母練氏又二歲練亡思源翁以

歸鞠焉孺人弱而能勤翁每稱說古義烈以警動之卒  
成女德長歸鴻臚鴻臚母華宜人與孺人之母再從姊  
妹也奉直公知孺人於是乎姻初孺人甫笄以範翁邁  
疾且殆孺人日夜侍湯藥不交睫者二旬比翁愈寐三  
日乃寤聞者異之及歸于錢姑華宜人先卒若干年矣  
奉直公家法嚴甚孺人冢婦也為衆所屬乃從容禮法  
以奉繼姑王宜人宗族以為能婦奉直公嘗以堪輿家  
言欲徙所居向西百步曰是為嗣續計顧力未及耳孺

人既脫簪珥以鴻臚佐其成然平居恂恂聲不出閫外  
奉直公益重之王宜人尤加敬愛蓋凡祠堂薦饋悉委  
焉後數年鴻臚游京師以範翁病亟時暑且疫家衆相  
戒莫敢近孺人聞訃號咷馳歸躬視二殮或謂盍少避  
孺人曰此而可避將焉為人終以過哀成疾數月乃已  
方其疾也家人北土者密戒勿言曰恐以累大人越幾  
年鴻臚得予告歸又幾年奉直公卒孺人相以襄事自  
是生業日艱外侮乘之則減節諸費一以延師教子為

務又幾年鴻臚卒哀疚中率諸孤於禮常曰業不患隳患隳汝學行耳汝父垂絕言不出此諸子聽惟謹用克底于成又幾年年六十諸子將設燕為壽孺人曰父志未成兒何用為是翰林學士荆溪吳公聞而贈之紀之以文又八年卒烏乎婦人之行莫大於孝孝盡於父母舅姑故夫說其順也子樂其慈也而衆德成焉然所害於孝者非利則害於斯不惑可謂難矣孺人天性令淑而孤苦荐歷所謂困心衡慮者蓋多有之宜其能然况

既老矣而猶共抑以終其身謂可以訓於其後者莫此  
為大它若處閨門族鄙雖盛節抑恒事耳且有墓銘在  
皆可畧也孺人子男三人其伯仲即仁復仁術皆縣學  
生季為仁衍女二人長適華升次適鄒瑚孫男六人去  
非去疾去偽去慾去回去怠女三人慶延受鄒聘壽延  
受華聘福延受惠聘曾孫男一逢吉女二慈秀受華聘  
慈愛尚幼孺人卒以正德壬申九月三日葬以十一月  
十四日墓在邑西開化鄉軍將山蓋諸錢同原異兆云

未軒吳府君妻龔孺人合葬碣銘

未軒吳府君既葬於湖濱第二灣之十二年正德丙寅正月七日其室孺人龔氏以疾卒其子文等以其年十月某日啟未軒兆合葬焉惟墳前之石不刻無以示久遂奉其塾賓錢君孝所為狀來請未軒之姑予從伯祖母也故予幼辱與未軒遊今其孫汝憲又甥於予其能辭諸未軒諱穀字民育未軒別號也其先居延陵六世祖均聘始徙無錫之間江子伯成仕元為青山鎮巡檢



其弟仲實國子學錄巡檢三傳至義官克勤克勤生承  
事郎良素承事娶于俞是生未軒未軒幼稟穎秀壯志  
脩警孝弟孚于家恭謹達于鄉而博以書史潤以詞翰  
邦人之譽無間於其師友漢世所謂賢良有行義者未  
軒蓋近之觀未軒之行而孺人可知已然其事亦有當  
特書者孺人姓龔世為武進人祖孟本父濟洪皆隱於  
耕母王氏孺人生而慧淑言行往往合古義比歸未軒  
逮事舅姑孝敬兼盡於是祖母鄧碩人期壽在堂孺人

能曲致其愛吳既望族而未軒又賢者喪祭婚姻之儀  
師資賓客之費賦稅力役之供孺人相之井如也孺人  
分為冢婦其族有諸祖姑行姑行姊妹行者各若干人  
無不謂孺人有禮至于妾媵僕從及里媪鄰姬皆有恩  
意尤嚴內外之辨三尺童子不踰屏闥諸婦守以為法  
凡為壽六十有四在吳者若干年蓋持德如一日云子  
男三皆邑庠生文娶同邑楊氏早卒繼鄒氏袞娶武進  
楊氏音娶武進趙氏女一適楊文煦孫男五愚聘朱氏

汝憲即予甥恣聘王氏愈聘陸氏息聘某氏孫女六長  
許嫁秦某次予弟國政子勲次華某餘幼惟孺人葬既  
成禮君子謂稱乎其德未軒之行於是為光且遠矣刻  
銘于表義也其詞曰循循未軒有政于家孰謂未達在  
邇可遐承乃祖父資乃師友有相者誰曰維賢婦易象  
相愛以助以刑若網在綱卒也相成古訓有之嘉耦曰  
配璧合以藏義取正位我銘石表望于湖濱凡厥伉儷  
有懷二人

華母鄒氏墓碣銘

有葬其母三十有六年而請銘其墓者曰華氏子謹其容戚然若有終身之喪其言曰吾母鄒年二十歸吾先君四年而沒時某方三歲不自知其悲也長聞傳母言吾母天性溫淑蚤習見家法且聞曲禮內則梗槩事父母能曲順旨父母特愛之有孝女之稱吾祖素負德望故為吾父求配而獲諾焉比歸為冢婦莊肅安詳春秋祠祀視滌視烹炙唯謹尤閑於儀當饋食時旋折中度

舅姑愛之如其父母孺人益虔親供膳事朝夕弗怠歲時父母有所遺必手調製乃進以為不爾非敬也雖處豐裕中蠶績剪製視中家加勤棋棹之贄不越戚吾父方勵精家政而好施予勤燕款吾母有將順之美自兄弟婚姻以至里鄙稱吾父者必及吾母然以遠父母故孝思日切顧舅姑家法不敢數歸寧吾外祖母卒哀傷成疾臨終時猶顧謹泣託鞠于傅母者甚悉某既有知念無以表吾母者乃以告吾從叔父韶州先生凡韶州

所狀皆不出吾所聞唯公圖之按狀母諱某姓鄒氏家  
泰伯鄉寔宋忠公浩弟洄之裔父曰良節例授七品階  
母惠氏其歸于華為文煥配舅曰守吉姑某氏母卒于  
成化乙未九月十九日距其生景泰壬申十二月二日  
年二十有四子一即謹由諸生卒業太學孫二長宇娶  
錢氏次察聘錢氏先是葬于椿桂山祖塋之次弘治十  
一年十二月壬寅文煥遷葬于艮山新阡謹用祖命遷  
母合焉銘曰有子而夭謂壽亦宜遷而從夫備物與儀

子壯而思礱石刻辭以慰厥慈烏乎悲哉

錢世節傳

錢槩字世節無錫人其先出吳越忠獻王三傳至進由嘉禾徙錫之湖頭又四傳至正三以行義稱又四傳至公達號梅堂徙磚橋今所居是也梅堂生閱耕諱正德閱耕生南邱諱溥豪邁有才識以其子今工部郎中榮貴贈禮部主事進工部署郎中世節南邱第四子也始南邱教之業儒沈默善悟以家故不卒業既而伯兄楷

為鴻臚序班于京師家政及焉世節殫力酬應南邱無  
內顧憂比析產以成室遜諸兄自闢草萊以居南邱卒  
襄事畢力立門戶愈勵勤儉於是工部擢甲科或以韋  
布為世節歟之世節曰分也苟無媿於禮義良農與貴  
仕等耳一意稼穡益求樹藝之灋豐收歟貸雖歟弗歟  
賦于公每先期退而靜處怡然自堪立小宗祠堂薦祭  
告謁禮不違義賓客之過從者簡餽而豐儀知者予之  
子仁衡游邑庠求師擇友皆惟其人嘗植梅後圃花時



步翫其下自謂知梅因號味梅其於世蓋泊如也年四十八卒配華氏子一即仁衡以學稱論曰吾聞諸工部世節貌偉而心下性樸而才密行儉而義周無武斷而鄉曲平無文飾而姻友篤中蓋有確然不拔者知弟莫如兄信斯言也如世節者可多得哉予於錢氏世戚徵諸其內外無間工部之言孟子所謂一鄉之善士吾於世節見之矣

福州知府張公傳

公諱遜字時敏姓張氏自號鈍軒累官至福州知府世為無錫人曾祖均佑元萬戶祖定父文簡以公貴贈涿州知州奉直大夫協正庶尹母錢氏贈太宜人公幼有敏識十四歲充縣學生二十四舉應天鄉試明年會試歸益力學越再試乃入太學卒業文譽日起遭父喪服闋又再試乃嘆曰命可知矣且仕以行義又何必進士之科之求也遂就選授福建同安知縣時同安缺官六年帑有隸銀若干兩或謂公悉取之公計日而取以其

餘充備荒糴本民稱其廉期年而政成縣東海上有五  
戍戍長擾民且弗受禁公至而止內侍某族大而驕人  
告侵其園田公立疆之一時荒政公為稱首公曰此何  
足稱荒在備耳乃即縣治及鄉建倉勸分以廣其儲擇  
耆老有行者司之至今不廢民葉宗發以豪干法走避  
嶺下族人往往負稅有死於獄者公簿其丁升分勾別  
日即稅完尋以治邑高第擢福寧知州福寧亦濱海多  
盜公選能者責捕之軍豪張某素負力撓法至是斂跡

餘悉帖服乃定役法民七軍三井井不紊未數月以內  
難奔歸服闋改涿州涿在京師西南為天下極衝使者  
絡繹應接不暇而地多宦者家尤號難制前守率以是  
廢政公處劇以預處勢以直不激不促久而安之凡守  
之務次第脩舉郡如僻焉安州監生張錦以人命誣其  
守宋某逮者三百人數年未決撫按以勘檄公公至安  
數語而服任邱謝令某徑捕張指揮某下獄某訟之且  
欲搏之死撫按曰此事須張某又檄公勘亦數語而服

公暇脩郡志質於宮詹陸公公歎其敏既而有福州之擢民老幼遮留不得則脫履以識思焉至福三月理舊務未完者千餘事發解戶以官物私販者五百餘事舊收十邑餘錢助附郭軍需公即革去更定驛遞夫以逸補勞民大稱便福在閩為會府鎮巡諸司交牒互判公晨起左右酬應無遺務夜燭治官書恒至漏下二十刻始罷城中外多火公每躬救之或日夜不再食始覺有疾輿而述職過涿之野民識公者奔走相告咸出拜曰

今何意復見吾父母比至城官屬以下郊迎館公公堂  
信宿而去還抵家疾漸亟乃諭其子曰吾受國恩不能  
報汝曹宜力為吾補之言訖而逝年六十四公歷三官  
四旌異政清勤公敏具在疏詞民為立碑者三曰愛民  
曰邵金曰德政作者皆鉅人嘗陪祀南郊與慶成燕論  
者以為盛配邵氏吾族尊姑繼王氏贈封皆宜人子二  
人曰瑤曰琇俱縣學生所著有鈍軒藁贊曰人有恒言  
吏莫難於三知謂府也州也縣也而公皆歷之人唯見

其易不見其難也且南閩北燕風土殊異而在在宜公  
公豈有異道哉書載簡廉詩咏豈弟公咸有焉某嘗過  
涿知公所以為州者觀于州而府縣可推也使少假之  
年厥績之懋當不止是是可惜也吾故詳著之

行恕丈人傳

丈人姓張氏字惟弟居有行恕齋故人以為稱錫之泰  
伯里人父以上世為士丈人幼喪母適遭歲艱二兄各  
以業養其父而丈人獨無以供子弟職於是始學為醫

師事同里黃叔洪叔洪之學朱丹溪再傳也丈人日質所疑夜歸誦讀無憚寒暑如是者數年而學有成辨證切脉悉合理道其變通之術暨炮製和劑之宜一時諸醫皆莫之及叔洪沒復兄事張用謙用謙亦出入黃氏而高明有獨見丈人與之講論以相資益故學愈精施之人多奇驗父兄資焉自是求者彌衆丈人日不暇給凡疑疾則歷檢方書必得其說乃用藥曰人命不可試也每活一人則大喜曰此方驗矣雖甚富者不責其報



貧者雖有報必却不受其友朱文立嘗疾丈人治之愈  
使家童數人負米以報先曾祖存一府君度丈人不受  
從旁竊觀丈人遇其人為之陳友義卒却之所居狹陋  
扁曰斗室或勸之廣之丈人不應蓋終身安焉年八十  
而精神不衰赴人之求雖數十里外亦徒行不索輿馬  
聞世事得失常為之喜戚觀其為人蓋非直精於醫者  
子一人景昭冠而死贊曰古人有言人定者勝天天定  
亦能勝人信斯言也丈人平生為善有陰德焉宜其子

孫衆盛且顯以收厚報而竟絕其後今雖未死然老且耄矣將猶待天定邪

林泉鄒處士狀

君諱忠字顯之姓鄒氏系出宋忠公之弟進士河汾之  
子樸遷無錫華莊五傳至仁榮又遷龍涇生德載德載  
生師道師道生莊英果負材局在國初始大龍涇之業  
莊生洪昭嚴毅爽達度量絕人人服其義洪昭生元字  
以善輪粟受散官克守考訓配華氏君性行夙成髫鬢

時事父母能迎意承色長益慎密每旦必省退而治事  
冠裳終日夜漏下十刻始入私室貨無私蓄食無私奉  
為糧長無乾沒計凡親治綜幹務當其意或有外事寒  
暑雨雪出復如期弱冠再遭喪哀慟幾隕宿食喪次者  
終三年年踰五十當忌祭墓祭猶號擗不已迄六十未  
嘗置酒為壽常以仲兄久病長姊季弟早夭為恨與伯  
兄處時節燕聚必盡其歡宗族環聽議論鑿鑿里閭傳  
誦為法伯兄卒君在病哭之甚哀平居禮度矜肅閨門

嗃嗃非甚病不內處語孩提以正延師交友久無遷心  
殺禮賻喪尤腴見鄉人取租量不以槩而貸息倍於法  
豐貸凶糶視利為計心獨病之乃一切除去歲捐租什  
一以為常稍饑則捐什二其出貸也遇饑減息如其取  
租其他如賙貧濟急濬渠建橋之屬義舉尤多府縣征  
役應之而已屢有勸分之令懇辭冠帶而發票如數最  
後不得辭乃命二子受之君初受產單瘠又以昆季處  
故居移息東偏兢惕從事幾年有妻之喪又二十年有

塘莊之遷蓋追承考志為之而儉約自持久而后成屋  
有扁扁有義外曰正德內曰崇禮此其大者餘具少宰  
王公記中君子謂君善居室類其為人婚嫁既畢因授  
事諸子微總綱要而春秋浸高又雅好煉養之術因自  
號林泉蕭散自適如神仙中人杜門靜坐不御爐扇中  
夜弗倦逮疾甚猶自盥櫛端坐而逝諸子殮以角巾布  
氈遵素命也君生正統丙辰十一月四日卒於弘治庚  
申六月二日年六十五娶錢氏繼惠氏子男五謙觀俱

義官豫晉升女七長適禮部員外郎錢榮次適郭悅生  
員吳文華錡義官華寅過楠浦會孫男七承祖紹祖學  
祖式祖述祖纘祖盾祖女九長適華世禎次許嫁楊耒  
華淨徐謚華琨錢永年華穀餘未受聘君卒之明年十  
二月十七日謙等葬於寧山先塋從其父兆乃具事行  
請為狀將乞銘焉寶嘗聞君氣雄度遠公懷直道表裏  
無間雖處田里而憂時憫俗恒若疾疢慕善嫉惡崇義  
後利喜與士君子語歟洽慨慷聽者起敬其論天下事

悉中機宜至於封域道里歷如指掌朝廷典故亦往往  
能道其槩幼不及學壯歲熟讀學庸論語及獵涉通鑑  
綱目尤好誦老杜詩時有賦詠忠憤激烈要亦近之晚  
嗜周易昧爽起秉燭坐誦久而有得卦賦一詩櫟括大  
旨書法兩沈搨本數十皆莊重縝楷寶家食時即知重  
君近嘗為君記務本之堂謂君可比漢之孝弟力田有  
行義者而文雅過之今君已矣能不一執筆以慰其子  
哉謹狀

容春堂別集卷八



欽定四庫全書

容春堂別集卷九

明 邵寶 撰

雜著

祭文

志

贊十

銘

跋

叙

祭松厓戴先生文

維年月日門生浙江按察使邵某謹以牲醴庶羞之奠  
敢昭告于故資德大夫都察院左都御史贈太子太保  
諡恭簡松厓先生戴公之靈惟公清慎之德醇懿之學  
兩奉璽書人馬是作始于南畿終于西關文化旁行學

者斗山公持權衡惟明克定謂公秉鈞是即公政公臬  
于浙公藩于閩風霜為威雨露為仁周旋司寇遂中執  
法公功不矜公謀不伐公在臺省風采峻凝每假色詞  
于我諸生十載京師春風賓館惟正惟忠誨言諄欸公  
以身請詔以國留天不憖遺公疾罔瘳惟公之沒天下  
所悼矧我諸生有德于教公喪北來丹旌悠悠嗟我懷  
公江水東流烏乎哀哉尚饗

九江謁濂溪先生文

維年月日具官某謹以牲醴之奠敬祭于濂溪先生周公某昔承乏江西嘗以公祠墓在茲疏聞于朝乞春秋享祀比得俞旨儀祝牲帛一如所請而某轉官赴浙未獲躬告茲由湖南東往淮鎮祇謁祠下敢用特羊竊附古人釋菜之義惟公鑒之

祭方伯婁先生文

惟公昔以正學教我南畿規圓矩方學者有師德化所被既去益思凡我諸生愛莫起之公名御史公賢伯長

嘉績在人諸生是仰寶也始進實舉自公暨乎再見禮  
遇益隆月朔之訓同人之義因事有言引掖斯至今也  
承乏視學于公之鄉瞻拜公墓踰奠一觴追感疇昔有  
涕霑裳尚饗

祭李容之文

維年月日謹以酒脯之奠致祭于李四丈容之之靈曰  
烏乎李丈吾師之季曰宦曰學綽有餘地顧乃壯而喪  
明強而長逝胡氣數之弗齊豈造物之為戲伯維元老

為吾儒宗靡遠弗嚮靡衆弗從季也有幸庭几從容曷  
其柰何而領教弗終烏乎哀哉葬也比時殮也具物母  
兄憑棺公卿執紼英靈有知亦何恨乎飄忽而某等猶  
為之悵悵者蓋真念夫斯文之肉骨也尚饗

邾州謁二蘇墓文

維年月日許州知州邵某自汝州東出眉山兩蘇先生  
墓下具隻雞斗酒再拜以奠之曰烏乎公之父子繼美  
如歆向而才則盛之公之兄弟聯芳如紀湛而文則華

某嘗怪古今天地之間氣夫何獨萃於公之一家也公之精英寓諸制作固百世而長留然其不可傳者將終藏於斯邱邪抑並二曜以齊光窮六合而上游邪某也不肖竊喜讀公之文每恨生不同世無以一登乎龍門眼中突然乃公之墳安得不慨然興感而放言以發吾所聞乎

霍山廟復碑志

上之新即阼也今少司徒太原喬公以太常少卿奉命

祭告山川之在晉者比至北鎮霍山既成禮達觀諸碑  
有一仆地舉而讀之則公之祖少司空先生景泰初有  
事於茲而立焉者也于今五十六年矣公摩挲感嘆欲  
為復立之圖而今大司空才公暨憲副來君方以藩臬  
守廵陪位遂礱石以請公乃以舊文用古篆體書而刻  
焉越四年公以模本示寶寶觀而嘆曰美哉喬氏世德  
如此可以仰觀我國家之盛矣粵自唐虞元凱以來于  
商則有若伊陟踵休于周則有若呂伋趾美悉著書史

蓋世之貴乎天下也久矣故觀國者率徵諸此若公於  
祖位望相承而後先五紀使命適同且於紀載之蹟似  
有繼述之道以數則不可謂偶矣以事則不可謂常矣  
它日志祠祀者錄而傳之君子必將以是擬諸商周觀  
一家而天下可知也烏乎是不可不謂之盛哉司空先生  
歷事三朝功業在人至于今猶稱之而公學行政蹟表  
表朝著方在登用其所以光厥祖而為朝廷重者豈止  
是而已哉寶辱公厚聞是事而喜為天下道也雖不敏



敢敬志之

陳晉庵像贊

此大方伯晉庵陳公之風儀也冕而立朝其在考功時  
邪翼乎若趨儼乎若思進退人才我酌其宜君相行之  
蓋上以為國下以為民而中不為吾私惟德有望惟才  
有譽起百辟之瞻結九重之知其在斯歟其在斯歟

南塘處士贊

吾嘗聞南塘處士乃今得瞻其遺容而起予之敬也蓋

其生也外不違和中無失正尋常收月旦之評七十享  
春秋之慶其沒也有祠棲神有碑述行分室而絃誦聲  
聞奕世而衣冠輝映由前而論可以占嗣續之繁由後  
而觀可以徵行業之盛烏乎休哉

薛仲文小像贊

有客兮古冠竚空山兮盤桓撫孤鶴兮發長嘯聽泉流  
兮潺湲有書卷兮不展有琴囊兮不彈松天風兮生高  
寒我為君兮賦考槃

景婁錢翁像贊

翁吾尊姑之夫也翁卒之七年某還自京師其孫諫諷以遺像

見示敬  
述贊言

吉人辭寡知德者希周旋田里帛冠布衣誰歟招者王  
孫不歸壯志高逸晚節謙柔碧山將栖乃復景婁誰歟  
招者羽客丹邱墓我為銘像我為贊我懷先生陋彼鄉  
訕

玉澗錢君贊

猗與若人行謂之士分謂之民書謂壽者詩謂嘉賓或

遠觀其世譜又謂故國之王孫即讓里而藝黍指鴻山  
而采薪考槃所謂洋洋之泌其在今玉澗之濱乎猗與  
若人我思古人

孫真人畫贊

以聖童始以山人終非聖不見妙與天通儒取其言醫  
師其意貌彼於菟聊爾為戲

龔守誠湖石贊

突如來如端拱而抗此何為者月星之精江湖之望洞

鹿君之丈人行也

莫冰泉行樂像贊

冬官莫君以此畫示予予謂其人丰神瀟洒有似於君也

為作贊語而歸之

風來松間我行徐徐丈尋千里沛乎廓如深蘊謀猷早  
謝書簿人亦有言能詩水部

葛芝巖小像贊

讀書窮理能自得師醫盡物情如其吟詩詩以名家醫  
以傳世采芝于巖優游卒歲興至高歌謂葛天氏古有

逸民子真是邪

東川莫君像贊

推其志也八極可以橫邁充其才也一面可以獨當英  
華所萃發為文章風儀偉然稱其冠裳何既強而后仕  
乃僅止於為郎惟其在車駕也有疏以解都民之困在  
都水也有法以制漕卒之強君子稱之久而愈光此所  
謂亡而不亡者邪

且閒鄒君像贊

道鄉之裔讓鄉之居風神秀爽骨相脩臞蚤持守乎清白晚被服乎紫朱汲泉淪茗尋鴻漸之故跡披雲招鳳吊伯鸞之遺墟稱之仙歟既歎焉而未足使之仕也或沛乎而有餘君子謂其自號且閒蓋實錄而非迂也

史敏甫贊

力學不倦斐然其儀師非好為求則應之古貌古心古有東野謂昌其詩允哉知者

錢梅林像贊

蚤聞庭下之詩晚悟牀頭之易箕裘其心韋布其跡雖  
未叅九老之班乃實與三賓之席植梅成林笑歌日夕  
斯人也殆書所謂而康而色曰予攸好德惟皇之極者  
邪

張玉亭像贊

賓于鄉也以德不以年隱于市也以心不以地義嘗著  
于一官醫獨妙于一世畫圖極山水之觀杖屨帶烟霞  
之氣有竹在庭作我真契謂公落落于人豈無意邪



楊府君像贊

家之肖子國之逸民時服則服時巾則巾孝之舉也或疑乎漢質之尚也似生於殷才堪百里之邑惠止一鄉之人吾論其德以附於斯神君子觀之將無得其真邪

書王友石所書金剛經後

經乃先高伯祖伯完裝成今歲久脫落為

重裝而歸

諸僧云

蓋聞唐室諸蘭亭惟僧藏者最妙蘇家四菩薩以父愛也尤珍慨人逝而物存諒天同而人比古今共賞巨細

同歸片紙千金既重中書之心畫百年一日兼勤先世  
之手裝敝則必修愛而莫助製我髹笥護彼緇函尚冀  
事附傳燈永作茲山之鎮義緣掛劒聊資他日之談謹  
跋

陳舞陽銘

清苑陳君通判吾常出示司成王公懋學所為舞陽異績序予讀而感焉

為之作  
銘銘曰

令脩泮宮鏹出土中廟堂孔嚴不以厲農惟令之功樓  
垂有瓜庭巢有鳩麥祥穀瑞于夏于秋民歌我侯侯有

仁心及于獸禽二牛轂鯨侯車實臨將死而生侯有德  
音牛邪鳩邪瓜穀麥邪有知無知識之格邪昔也舞陽  
今也毘陵君子是徵我為作銘

坐椅銘

江西諸分司所用椅多高聳不便久坐坐予每校文輒携此以行是雖細故於身心蓋有助焉友人周仲章謂其功不可忘予乃志之以銘銘曰

我行西江惟汝之以既康且舒夫焉有倚我展我體天  
寬地容允哉繩墨惟汝之功

經鋤室銘

錢諫昌言扁其別業之室曰經鋤蓋取漢人故事以勵其志也冉涇邵某

為之銘  
銘曰

漢兒寬氏帶經而鋤雖一事微百世弗磨農夫有田猶  
儒有經非心弗治非種弗生有經無心有種無田勿忘  
而忘荒哉落焉田與種涵經與心會古之學者以斯而  
貴寬也雖賢恐或未聞夷考其成飾吏以文君家世儒  
亦世服農先難後獲異事同功既顏于堂復銘于室乃  
亦有秋道不謀食

書篋銘

萬化散殊中含有常靜觀者程妙契者張我思曾氏唯  
于孔堂今曷求之孟子曰必有事焉心勿忘也

跋白沙先生草書卷

白沙之為書有定力而妙者也吾見此卷於京師幾三  
十年矣今為莫利卿所藏復一見之無改評焉乃或手  
執東茅輒號於人曰吾書白沙云云豈知白沙之為書  
者哉論學於白沙者亦當以是求之


跋周雲漢所述姓源便覽

百家姓童蒙始習之書也孰不能誦且書之而東泉君必為之正其音校其字疏其源者何居以言乎事則近以言乎用則切以言乎人道則大矣梓而傳之不亦可乎

叙女夢吉生死

女夢吉生壬寅五月十有三日先一夕予宿文溪書舍夢入大殿有巨人迎授之物曰此貝也既寤而內媪以女生告遂名之生四月即能翻書指字呀呀然言人莫

能解也是冬予在南雍一夕不寐達旦起坐泣不止未  
幾家人至曰吉病疹以正月四日死計之適合不寐之  
夕嗚呼女吉生先之以夢宜其能育而遽死死而遠動  
予心胡然者邪明年甲辰予獨處京師追思之甚悲乃  
叙其生死



容春堂別集卷九